

上清洞真智慧觀身大戒文

承十

智慧觀身大戒流景散漫煖煖太虛積三千餘劫其文乃是元始天王受之太上高聖道君於是相與登洞真之堂說而誦之以傳太微天帝及太極高仙天王口口而已不書於文太微天帝受戒時頌

智慧起本無朗朗超十方結空時玄霄諸天把流芳其妙難思議虛感真實通有有無不有無無無不容智慧常觀身學道之所先眇眇任玄肆自然錄我神天尊常擁護魔王為保言晃晃金剛軀超太上前智慧慧生戒根真道戒為主三寶由是與高聖所崇受況此不死舟倏欵濟大有當此說戒時諸天來稽首道學不得殺生暨蠕動之蟲  
道學不得教人殺生暨蠕動之蟲  
道學不得飲酒  
道學不得教人飲酒  
道學不得綺語兩舌不信  
道學不得教人綺語兩舌不信  
道學不得淫犯百姓婦女

道學不得教人淫犯百姓婦女

道學不得竊盜人物

道學不得教人竊盜人物

道學不得嫉賢妬能

道學不得教人嫉賢妬能

道學不得背師恩愛

道學不得教人背師恩愛

道學不得不忠其上

道學不得教人不忠其上

道學不得因共下

道學不得教人因共下

道學不得欺誑同學未解之人

道學不得教人欺誑同學未解之人

道學不得輕慢弟子

道學不得教人輕慢弟子

道學不得口善心懷陰惡

道學不得教人口善心懷陰惡

道學不得說人過惡

道學不得教人說人過惡

道學不得重積七寶不散施四輩

道學不得教人重積七寶不散施四輩

道學不得樂人錢財雜物為己重擔

道學不得教人樂人錢財雜物為己重擔

道學不得畜刀仗兵器

道學不得教人畜刀仗兵器

道學不得養六畜

道學不得教人養六畜

道學不得金銀器食飲死厚葬骸骨

道學不得教人金銀器食飲死厚葬骸骨

道學不得食樂榮祿

道學不得教人食樂榮祿

道學不得燒敗世間寸寸之物

道學不得教人燒敗世間寸寸之物

道學不得以世間堪食之物投水火中

道學不得教人以世間堪食之物投水火中

道學不得食世滋味

道學不得教人食世滋味

道學不得貪食五辛

道學不得教人貪食五辛

道學不得為草書

道學不得教人為草書

道學不得以麤物易人好物

道學不得以教人麤物易人好物

道學不得知預軍國事物

道學不得教人知預軍國事物

道學不得設權變謀

道學不得教人設權變謀

道學不得無故見天子王侯

道學不得教人無故見天子王侯

道學不得干知天時指論星宿

道學不得教人干知天時指論星宿

道學不得以火燒田野山林

道學不得教人以火燒田野山林

道學不得無故摘眾草之花

道學不得教人無故摘眾草之花

道學不得親近惡人

道學不得教人親近惡人

道學不得無故伐樹木

道學不得教人無故伐樹木

道學不得人中多語恭預流俗

道學不得教人人中多語言恭預流俗

道學不得人中獨食

道學不得教人人中獨食

道學不得預世間婚姻事

道學不得教人預世間婚姻事

道學不得習世間妓樂

道學不得教人習世間妓樂

道學不得泄人陰惡私鄙

道學不得教人泄人陰惡私鄙

道學不得妄求窺人書疏

道學不得教人妄求窺人書疏

道學不得與女人獨語獨行

道學不得與女人同行行必有宗

道學不得與女人同座男女羣居

道學不得與女人同食交錯衣物

道學不得親教女人

道學不得說人祖宗善惡

道學不得面譽世人

道學不得以毒藥投淵池江海中

道學不得教人以毒藥投淵池江海中

道學不得親宗族

道學不得踈異姓

道學不得教人落子傷胎

道學不得教人離別家室

道學不得因恨報怨

道學不得淫愛弟子

道學不得妄聚集人眾

道學不得教人妄聚集人眾

道學不得投書讚世人

道學不得教人投書讚世人

道學不得自貴

道學不得教人自貴

道學不得自驕

道學不得教人自驕

道學不得自是用性

道學不得教人自是用性

道學不得妄多忌諱

道學不得教人妄多忌諱

道學不得希望人物

道學不得教人希望人物

道學不得塌破池

道學不得教人塌破池

道學不得評論師友才思長短

道學不得輕慢經書皆毀法言

道學不得教人輕慢經書皆毀法言

道學不得薄賤老病

道學不得教人薄賤老病

道學不得棄薄乞人

道學不得教人棄薄乞人

道學不得恃威勢以凌世間

道學不得教人恃威勢以凌世間

道學不得阿黨所親

道學不得教人阿黨所親

道學不得與父母別門異戶

道學不得教人與父母別門異戶

道學不得嘆悲弟子

道學不得嘆責世人

道學不得罵人為奴婢畜生

道學不得罵奴婢面傷其四體

道學不得快人過失

道學不得教人快人過失

道學不得飲告類擾世間

道學不得為世俗人作禮主

道學不得為人圖山立宅

道學不得占知世間吉凶

道學不得教人占知世間吉凶

道學不得去就背向

道學不得教人去就背向

道學不得與世人羣處

道學不得無故見責人

道學不得乘車戴馬

道學不得奪人所欲

道學不得馳騁流俗求競世間

道學不得慶弔世間求悅眾人

道學不得掩他人之功名為己德

道學不得臥寢金寶雕牀

道學不得與名人飲食好惡

道學不得驚懼百姓妄說衰厄

道學不得驚懼鳥獸促以窮地

道學不得妄驚怖老小

道學不得輕凌官長有司

道學不得預世間論議曲直

道學不得施惠追去

道學不得遊邀无度

道學不得妄登高樓

道學不得寵飛鳥走獸

道學不得塞井及溝池

道學不得快人家喪禍

道學不得以棘橫人行道

道學不得教人以棘橫人行道

道學不得祠祀神祇

道學不得教人祠祀神祇

道學不得向神鬼禮拜

道學不得教人向神鬼禮拜

道學不得標形三光妄呵風雨

道學不得換舉人物不還債主

道學不得折割人財

道學不得勸人為惡事

道學不得禁人為善事

道學不得諸天齋戒而不齋戒念道

道學不得違歲六齋月中不齋

道學不得違經教科戒禁律

道學不得為人作辭訴

道學不得唱論人惡

道學不得信人言以恚世間

道學不得笑人頑闇貧窮

道學不得以意增減經戒

道學不得傲悞三寶輕忽天人

道學不得勸人謀反君長師父

道學不得勸人不孝父母兄弟

道學不得矯稱自號為真人

道學不得信用外道雜術邪見不真

道學不得衣物盈餘

道學不得強人道學

道學不得无經託學欺詐人神

右觀身戒從第一戒至一百八十上仙之

道名玉清智慧下元戒品

道學不得望人禮敬

道學不得竊寫人經戒

道學不得榮飾衣褐

道學不得身不潔淨上高座讀經

道學與人同行當讓入以前

道學與人同學夏秋變供養

道學與人同學冬執瓶供水

道學與人同食當食其糲及菜

道學與人同食當食正已前

道學與人同學當敬先勝已

道學與人同學住當任人處分

道學與人同學當念教不解

道學與人同學當請問先進

道學人施惡於己已受惡不得有怨

道學不得懷怨恚報於人

道學與女人共語不得正視面容含笑相對

道學與女人同渡水不得正眼看之

道學失物不得疑似同學及眾人

道學失物當委運自悔多罪

道學多災病當恭己自責念改往修來

道學當忍人所不能忍

道學當割人所不能割

道學當衣人所不能衣

道學當食人所不能食

道學當學人所不能學

道學當容人所不能容

道學當受人所不能受

道學當斷人所不能斷

道學無經業精神浮散真想不通

道學身不潔淨魂魄離人

道學有心則天真高遊魔官不服

道學有家則三毒不滅三真不屈

道學有身則眾欲不去精思无應

道學有虛心靜寂寞與真對

道學當安玄泉不使妄動生元

道學當滅識藏見然後真人見

右觀身戒從第一至二百一十六無上正

真之道名玉清智慧中元戒品

道學當念菜食為常

道學當念先度人後度己身

道學當念居山林幽靜精思

道學當念安貧讀經行道無倦

道學當念燒眾名香流芳諸天徹魔境界

道學當念在賢衆聽受妙旨  
 道學當念請受三洞寶經勤身供養  
 道學當念立功度人終劫不倦  
 道學當念報師友本德終劫不忘  
 道學當念國中清淨王化太平無有不道  
 道學當念隣國有道各守境界  
 道學當念咒願百姓令常安全  
 道學當念萬物為先不得道已  
 道學當念遠鬼神不敬不慢  
 道學當念遠在術禁忌之道  
 道學當念遠聲色歌舞之術  
 道學當念遠幸效鬼神妖妄之人  
 道學當念崇本守真  
 道學當念口不道心心不負形  
 道學當念無疑或聖文損益科法  
 道學當念无求无欲  
 道學當念清白守貞  
 道學當念心无異想唯空唯寂  
 道學當念家家安寧成無苦痛  
 道學當念世間憂厄之人罪繫苦惱咸得消釋

道學當念天子聖明弘道皇家日成  
 道學當念主相弘輔常保有道  
 道學當念天地日月風雨霜雪以時  
 道學當念父母養我因緣  
 道學當念七祖父母成昇天堂  
 道學當念我師早得果度  
 道學當念我同學未泐道源淵與典章  
 道學當念同志轉相教導令入正道  
 道學當念不違其口所誦之文  
 道學當念視人父母如己父母  
 道學當念視人子過己子  
 道學當念視人身過己身  
 道學當念視人傷人痛過己身  
 道學當念視人辱惡過其己身  
 道學當念我宿命因緣根斷  
 道學當念我胎根已絕不復世生同緣種親  
 道學當念我生樹已枯神合太元无數之劫  
 體道合真  
 道學當念三塗路塞地獄長休  
 道學當念中食養神棄諸肥滋

道學當念慎大法常存三官真人子丹  
 道學當念觀世和光不驕於俗  
 道學當念持三寶經戒常誦不輟  
 道學當念存雌一誦大洞經眇若對神  
 道學當念登仙度世乘雲駕龍  
 道學當念欲見師友同學之人  
 道學當念見真人道士修行法事  
 道學當念見聖王治世海外稽首乘風向化  
 道學當念食天厨自然之膳無飢渴之想  
 道學當念與天真共對澹然無爲  
 道學當念使仙童玉女  
 道學當念東遊青林東華  
 道學當念南遊太丹南華  
 道學當念西遊安養西華  
 道學當念北遊碧羅北華  
 道學當念遊東北方救百姓男女授其勸戒  
 度入東北之門使得入無爲之場  
 道學當念遊東南方救百姓男女授其勸戒  
 度入東南之門令得與道爲因  
 道學當念遊西南方救百姓男女授其勸戒

度入西南之門令得入無為之道

道學當念遊西北方救百姓男女授其勸戒

度入西北之門當得昇入至真之場

道學當念遊遼留秦閭臺崑崙

道學當念遊志齋堂講肄聖道敷釋淵曠

道學當念遊上清金闕禮見真人太上

道學當念遊王清七寶宮禮三元天尊

道學當念遊玉清丹霞宮禮太上二十四高聖

道學當念遊太上玉京七寶流霞臺蓋玉林禮

太上天尊十方大聖終劫復始

道學當念遊紫雲宮禮洞真三十九高聖

道學當念遊三十六天黃金宮禮天帝君

道學當念遊九天黃金暉宮禮无上至真

道學當念遊諸天宮宅與真人問道論經

道學當念遊六天七寶宮觀化大魔王見我

符籍以入仙品示離泉曲簿

道學當念遊日月官殿光明煥赫禮見日月

王飲以日月華金液之漿

道學當念遊大梵天流景宮禮四天王聽

諸天誦誦霄絕雅妙

道學當念遊諸天七寶林反生靈香流芳逆

風聞三千里外師子飛龍鳴嘯其咽

道學當念遊諸天浴池安座蓮華之上香潔

自然流汨諸天池百千池皆如一處人人快樂

道學當念遊諸天聽諸天效樂无世間之想

道學當念遊十方外天禮大聖象无上正真人

道學當念遊下方无極金剛天宮禮諸元老

真人

道學當念遊天地名山隱宮洞室禮聖象先

得道人

道學當念以心為道終无邪見異念當令心

虛意泰不思不慮安思空寂

道學當念隱秘天真名諱不出我口

右觀身戒從第一至三百首太上无極之

道名高上玉清智慧上元戒品

元始天王曰夫高上洞真智慧經不宜世上

學子皆多傳已成真人見故難見而難盡是

以希見於世矣是戒尊重不可以言宣觀塵

人身諸神三百關節真靈不得妄出魔試不

能得犯人受誦此戒不違其禁亦可不學而

出雲霞碧與自然迎子白日昇天浮身空浪

放十方項生圓光煥耀太无率天眾聖莫敢

不敬仰於子也六天大魔王是時即舉奉戒

之士東華宮言名大梵天宮大梵天宮言名

玉京金闕刻以上仙之品

元始天王曰大洞真誦誦之萬遍雲駕下

迎靈寶洞玄經有度劫之文其人修之而或

不仙及金丹靈液不成何也故由不得修奉

智慧觀身戒耳故是戒眾妙之妙威神極尊

金華仙人九百立侍燒香焉是真秘之道不

傳於文當誦習而已夫學道不受此戒終不

成仙或造業隨於聲色或始勤末懈或入山

居家為眾魔所試敗或生異念疑惑真經或

還從俗无復道心或輕慢師友毀辱同學或

卒發狂癡性氣倒錯或貪財愛色及薄三寶

或家道輒軻恣對恚會或惡夢亂想精神愁

悶皆由無大戒以攝其心神三毒浮尸狡詐

五府是知斯患也魔王不削泉曲死名三界

不過仙品也

元始天王曰是戒因靈仙而見今諸天諸地

名山仙人悉奉而行焉每至朔望六節本命元辰諸天齋日同學師友入室說戒一周先禮十方每方一拜諸天聞說戒日皆各作禮焉弟子願欲奉戒當資上金五兩以爲五帝之信丹錦十丈爲十方贊代夫落簪之盟不泄戒律以奉有戒之師對齋三日思念戒旨是夕當然十燈供養光明十方大聖以表我心矣若其時風雨雷霆激迅未可得受也當更齋戒重自恭肅臨時亦將神開意散矣奉戒九年神燭自明日月華丹金容內發童顏充肌神通四達與高仙齊德出入無間能奉此大律戒則濯纓派汨之池解鈴于七寶之臺遊觀華池之上蔭以反生香林金光鮮蔚從劫到劫永享道真本命日正中若夜半北向誦太上徊玄大品章以洞十方太上太微天帝曰是戒名智慧觀身戒一名保仙靈文一名高上洞真度命靈丹自非有宿世功德垂慶累業福祚所延者終不令見此寶秘矣東華无金簡玉名亦不使與是師相遇也能奉之者是子命應仙矣有經而无戒猶欲涉海

而无舟楫猶有日而无舌何緣度此身耶夫學者不知尋經知尋經而不知尋戒是未悟真要之根長夢而不覺可爲痛心矣皆當量己能奉者資信受之受者九百年得口授一人不得過一人若過一人是爲洩戒洩戒罪及七祖父母幽子厄地獄身履三塗五苦八難終劫復始轉輪惡道去仙日遠冤家債主因時亦會各慎身焉太微天帝曰敢有竊聽戒者即爲諸大魔所糾中必至之禍萬無疑矣若奉戒弟子獨處山林可畏之地鳴天鼓十二通心存戒神戒神衛已三重妖魔鬼魅不敢近福德當隨身諸天善神各各擁護也先是冤家債主皆生慈心矣太微天帝曰我昔始學之時唯知請經不知尋戒乃歷劫生死太上懲我道心高聖哀我不懈見告云子學彌勤而不知奉觀身大戒當何由得仙乎我於是稽首金闕之下三千日太上見授要戒奉而修之九年之中雲輿來迎三界十方真人交會於玄虛矣故道學當

以戒律爲先道家之宗尊焉法應習誦上口古聖啓秘而盡書也今奉之亦然弗令文脫凡俗矣太上明燈頌  
未見然燈皆當誦此文不但受戒時也叩齒三通微爲之勿使他聞聲凡叩齒悉爾  
太上散十方華燈通精誠諸天皆亦然諸地悉朗朗我身亦先徹五藏生華榮炎景照太无遐想繁玉清丹精寄太无玄陽空中嚮舍形滅苦根幽妙至真想垂華不現實因緣示光象戒身亦如之乘化託流景夜光表陽丹迢迢照靈室諸天普光顯諸陰即已滅我神亦聰明常玩智與慧道運適道運運謝任天勢舉形踊空洞夜燭煥旒萃  
太微天帝曰徒然燈而不知此誦六天魔府不過人死命八方諸天不遣玉童玉女飛天真人降於子矣十方三界不度兆仙名於東華南宮不受子七祖父母化生之道  
太微天帝曰道舉不奉觀身大戒而誦經萬徧隱處山林昇仙之舉恐未可希耶若能戒全於內和光於外猶庶幾乎靈標之涯也非

道舉難奉戒難耳子能全戒余乃十方太上將保登仙也戒全而誦寶經佩大符若復不仙天下无有不死之道矣我之戒所慨世求其人難得耳末世多託聲名於浮華罕見道德之真心是以三寶沈昧聖人潛衷真道之弘耶受戒若全十方大聖自然見於子也是不學而仙道成矣此不虛言不虛言欲何為哉正恐世間之志士耳因緣會當有可教者乎子其勗之子其勤之仙道就何樂如之道遙于太上玉京放任于自然之域是為歡樂太上前萬劫猶未始此之謂矣真非翰札所能宣也

太極真人曰吾昔聞於太上言誦三寶洞經而不是大戒仙道眾妙胡緣而成耶故口口而已不宣於文將獨逸於三寶之死固矣宿無上仙之相好者亦終不令見也自非七祖積慶繁華幸係因緣累葉宜功彌劫豈知願樂太上觀身之戒子能奉是者便為太上大法師三寶之宗焉十方皆敬子於雲漢羣仙將引子於東華坐召天魔魔王舉此符命於

三界六天泉曲之府太山主者地官元復有應死之錄籍也青宮仙名乃定於是耳將當為玉京之高仙太上之真人焉

太極真人曰夫道要在行合冥科積善內足然後始涉大道之境界耳自弗能爾者皆為徒勞於風塵無益生命之脩短也道在我不由彼惟慈惟愛惟忍惟辱能行此四等亦與道為隣矣能勤能信能顯能終能諫諍能棄色酒是為六度之法亦與真為儔矣能受非不自申能讓於人能不欲能容无理不爭能遠无道藏身幽處能不違心能不負經戒能不伐口戒所謂此八能亦善善為友矣

太極真人曰戒律之為道威嚴神妙恐人不能有心歸奉故當祕而不書耳是以智慧經篇終不能悉顯於末學之士矣口口相傳將亦何由而泄耶當其說戒之時十方天人又手敬聽鬼神皆禮於所聞豈可輕而為哉

太極真人曰夫古人之為道也玄寂靜神念真自然不動坐忘真道已成端拱雲車立迎矣或乘風凌空駕龍騁虛舉身踊无飛昇太

極體於空洞而无待也是以迹不可見世无我知我者希則我者貴此之謂乎合符契矣若為師友情說言而為固非上古之法未學所制耳若必是學士願請寶經審觀其人意既洞悟便對經於太上前啓告而付之令業文而宗奉焉乃合太上古科大法矣苟無弘道之才胡以七祖證十方而當違此哉自可先深思省子身能奉與否三塗地獄十苦八難豈可輕耶視之令心寒於諸賢善慎明戒則福自然矣背爾之心禍亦自然矣苦痛切身時刻巨過何況彌劫乎

太極真人曰雖復終劫始劫是戒不易之道古人曰受而身行道成之日迹或顯或否於外世故不測其所修為矣是上古以披衣坐忘而得道軒轅陶鼎而龍迎故能洞觀十方超凌三界王喬赤松所以乘紫煙而高翔天庭皆其類也不能具說具記此豈非所謂不學而仙道成者乎

上清洞真智慧觀身大戒文

1100114024